

**Eqqumiitsuliortut eqqumiitsuliornikkut suliaqartillutik akissarsiaasa B-Indkomstitut
tigusinnaalersillugit periarfissaqalernissaat pillugu Naalakkersuisut
peqquneqarnissaannik Inatsisartut aalajangiiffigisassaattut siunnersuut**
Aqqalu C Jerimiassenimit, Atassut, saqqummiunneqartoq

pillugu

Aningaasaqarnermut Akileraartarnermullu Ataatsimiititaliap

siunnersuutip aappassaaneerpeqarneranut

ISUMALIUTISSIISSUTAA

Aningaasaqarnermut Akileraartarnermullu Ataatsimiititaliap suliarinninnermini kingullermik ilaasortarai:

Inatsisartunut ilaasortaq Peter Olsen, Inuit Ataqtigiit, siulittaasoq

Inatsisartunut ilaasortaq Pele Broberg, Naleraq, siulittaasup tullia

Inatsisartunut ilaasortaq Marianne Paviassen Jensen, Inuit Ataqtigiit

Inatsisartunut ilaasortaq Kristian Jeremiassen, Inuit Ataqtigiit

Inatsisartunut ilaasortaq Karl Tobiassen, Siumut

Inatsisartunut ilaasortaq Kuno Fencker, Siumut

Inatsisartunut ilaasortaq Jens-Frederik Nielsen, Demokraatit

UPA 2024-mi ulloq 2. maj 2024 siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Inuussutissarsiortut namminersortut allat assigalugit eqqumiitsuliortut assigiinnerusumik akileraartarnikkut sinaakkuteqartinneqarnissaat siunnersuuteqartup kissaateqarnera siunnersuummi siunertaavoq. Siunnersuuteqartup kissaatigaa eqqumiitsuliortut namminneerlutik B-tut isertitaqarlutik nalunaaruteqarnissaminnut periarfissinneqassasut aammalu akileraarut B tasuuna akiligassanngortassasq.

Taamaaliornikkut eqqumiitsuliortunut tapersersuisoqarsinnaasq eqqumiitsuliortullu piginnaasaminnik aallussisinnalissasut siunnersuuteqartoq isumaqarpoq.

Siunnersuutip Inatsisartunit siullermeerneqarnera

Eqqumiitsuliortartut tapersorsorneqarnissaat pillugu nalinginnaasumik isummerfigineqarpoq aammalu eqqumiitsuliortut ilungersorlutik namminneerlutik akileraartarnermut tunngasunik isumaginninniarissaat pinaveersaartinniarlugu akileraartarnikkut malittarisassat sapinngisamik ajornanngitsuutinneqartariaqartut. Siunnersuummik siullermeerinnineq ima inernilerneqarluni naammassineqarpoq, siunnersuut aappassaaneeraneqannginnermini Aningaasaqarnermut Akileraartarnermullu Ataatsimiititaliamut innersuussutigineqarnissaa tulluurtuusoq.

Ataatsimiititaliap siunnersuummik suliarinninnera

Akileraartarnikkut ilanngaait pillugit apeqquummut tunngatillugu nipilersortartut nammineerlutik nalunaarsukkaminni inuussutissarsiornikkut aningaasartuutigisimasaminnik ilanngaassinissaminnut periarfissaqareersut Naalakkersuisut paasissutissiissutaat aallaqqaasiutitut ataatsimiititaliamit eqqaaneqassaaq. Tamanna tunngavigalugu eqqumiitsuliortut nipilersortartullumi innuttaasunut allanut sanilliullugit allaanerusumik inissisimangitsut ataatsimiititaliamit paasineqarpoq.

Naalakkersuisut akissuteqaataat aallaavigalugu Eqqumiitsuliortut nipilersortartullu periuseq aalajangersimasoq malillugu nammineerlutik nalunaarsuinerminni eqqumiitsuliornikkut ingerlatsinermit isertitat pineqartillugit, isertitatut A-tut nalunaarutigineqartumik B-tut isertitanngorlugu allannguisinnaasut ataatsimiititaliami paasineqarpoq. Malittarisassat atuuttut Akileraartarnermullu Aqutsisoqarfimmi allaffissorneq Naalakkersuisut innersuussutigaat. Pissutsit taakkua tunngavigalugit Naalakkersuisut ilisimatitsissutigaat siunnersuuteqartoq inatsisit atuunnerannik atuutereersumik kissaateqartoq. Taamaattumik siunnersuutip akuerineqarnissaa Naalakkersuisut inassutiginnigilaat.

Inatsisit atuunnerannik Akileraartarnermut Aqutsisoqarfiup allaffissornera ullumikkut ataatsimiititaliap paasinninnera malillugu ima inissisimavoq, eqqumiitsuliortup eqqumiitsuliornermik ingerlatsinermini akissarsiat A-tut nalunaarutigineqartartut naak piviusoq malillugu akissarsiat B-tut isertitaagaluartut. Aningaasarsianik tunniussisoqarneranut atatillugu akileraarummik A-mik akiliisoqartussaavoq, taanna eqqumiitsuliortumut akissarsiat tunniunneqannginnerini ilanngaataasussaalluni. Aatsaat tamatuma kingornatigut allannguisoqarsinnaavoq, tassani akissarsiat nalunaarutigineqareersut akileraarfioreersullu B-tut isertitatut allanngortinneqarsinnaallutik.

Siunnersuuteqartup siunnersuutimini anguniagaa ataatsimiititaliamit imatut paasineqarpoq, eqqumiitsuliortut akissarsiaminnik B-tut nammineerlutik nalunaarsuisinnaanissaat periarfissaalissasoq, taamaaliornikkullu akissarsiat tunniunneqarneranut atatillugu akileraarummik A-mik akiliinissaq pisariaqarunnaarluni. Taamaalluni eqqumiitsuliortoq akileraartarnermullu aqutsisoqarfik allaffissorinnikkut marloriaammik suliaqartarnissaasa pisariaarunnissaa siunner-

suuteqartumit anguniarneqarpoq. Tamanna aamma ima isumaqassaaq immersuisussaataasup, assersuutigalugu tusarnaartitsinissamut aaqqissuisup, allaffissornikkut suliassaanik oqilisaasinissaq.

Allannguutissatut siunnersuut:

Immikkoortup matumani pineqartup ataatsimiititaliamit suliarineqarnerani allannguutissatut siunnersuutit marluk saqqummiunneqarput.

Allannguutissatut siunnersuutip aappaa Inuit Ataqatigiinneersoq ima oqaasertaqarpoq:

”Aningaasarsianit akileraarutit aamma sulisoqarnermut akitsuutip akilersinneqartarneri pillugit Namminersorlutik Oqartussat nalunaarutaanni § 7, imm. 8 atuuttoq naapertorlugu kisimiilluni erinarsortartutut nipilersortartutullu, timersornikkut aliikkusersuisartutut, nipilersortartutut, atuakkiortutut imaluunniit allatut tamatigit eqqumiitsuliortutut akissarsiat, taamatut ingerlatsineq CVR-normoqarluni ingerlanneqarpat isertitatut B-tut isigineqartussanngorlugit aalajangersakkanik aalajangersaanissamut suliniuteqarnissamut Naalakkersuisut peqquneqarnissaannik Inatsisartut aalajangiiffigisassaattut siunnersuut.”

Allannguutissatut siunnersuutip allaffissornikkut aningaasaqarnikkullu kingunerisinnaasai pillugit Naalakkersuisumut apeqquteqartoqassasoq ataatsimiititaliamit aalajangerneqarpoq. Ataatsimiititaliap apeqquteqaatai Naalakkersuisullu akissutai ilanngussatut kakkiunneqarput innersuussutigineqarlutillu.

Naalakkersuisut akissutaannik tigulaakkat:

CVR-imik normoqarneq akileraarusiinikkut immikkut inissisimanermik kinguneqarneq ajorpoq. Isertitat assigiimmik akileraaruserneqartarput, ilanngaatiluu assigiimmik ilanngaa-taasarlutik, tamatumani CVR-normoqarneq normoqannginnerluunniit apeqqutaatinnagit.

CVR-normoqarneq innuttaasut ataasiakkaat naatsorsuuteqarnissamik, nammineerluni nalunaarsuinissamik il. il. ilisimaarinninnissaanut pisussaaffiinullu qaffasiinermik piumasaqaateqarfiusarpoq.

Nalunaarutiginnittussaataasut (soorlu nipilersorfiit) inuussutissarsiortunut ilaasunut akissarsianit akileraarutissamik ilanngaallutillu akiliisarunnaassapput. Tamanna innuttaasuni akileraartarnermullu ingerlatsivinni allaffissornerunermik kinguneqassaaq.

Innuttaasut ullumikkornit akulikinnerusumik akissarsianik B-nik akileraarutaagallartunik ilanngaatitaqanngitsunik (A-tut akileraarut) akissarsisalissasut Naalakkersuisut naliliipput. Akileraartarnermut Aqutsisoqarfik akileraarusiinissamut nakkutilliinermullu atugassanik suli akissarsiat akilerneqartut pillugit paasissutissanik pissarsisassaaq. Akissarsiatut nalunaarutaasut nammineerluni nalunaarsuiffimmut ilanngunneqareersinnaapput.

Innuttaasunut ataasiakkaanut isertitat A-tut B-tulluunniit isigineqarneri aningaasatigut sunniuteqarnaniluunniit annikitsuinnarmik aningaasatigut sunniuteqassasoq Naalakkersuisut paasissutissiipput.

Akiligassatigut kinguaattoorutit amerlisinnaanerannik, isertitat akileraarutigineqanngitsoortut amerlisinnaanerannik, taamaalillunilu akileraarutitigut iluanaarutissaagaluanik annaasaqartoqarsinnaanerannik kiisalu unioqutitsinernik sulianik siunnersuutip kinguneqarnissaa Naalakkersuisunit naatsorsuutigineqarpoq. Tamatuma peqatigisaanik Naalakkersuisunit paasissutissiisutigineqarpoq pissutsit siuliani taaneqartut nassatarisaannik aningaasartuutaanerusussat qanorpiaq amerlatiginissaat oqaatigineqarsinnaanngitsoq. Kiisalu allannguutissatut siunnersuutigineqartup Akileraartarnermut Aqutsisoqarfimmi allaffissornermut aningaasartuutit amerleriannerannik nassataqarnissaa Naalakkersuisunit qularutigineqanngilaq.

Atorfeqartutut inissisimanissaminnik imaluunniit nammineq akiligassiisuteqartarnissamik nunatsinnilu akileraarutissanik nalunaaruteqarnissaminnik nipilersortartut eqqumiitsuliortullu namminneq toqqaasinnaanissamik periarfissaqarnissaat pillugu allannguutissatut siunnersuummut siuliani taaneqartumut allannguutissatut siunnersuummik iluarsisamik, allannguutissatut siunnersuummut siuliani allassimasumut malitseqartitsissutitut, ataatsimiititaliaq isumaqatigiittoq saqqummiussaqaarpoq-

Ataatsimiititaliaq isumaqatigiittoq allannguutissatut siunnersuummik imaattumik saqqummiussaqaarpoq:

“Aalajangersimasumik atorfeqartoqartinnagu aammalu CVR-normoqarluni ingerlatsisoqarnerisooq apeqqutaatinnagu kisimiilluni erinarsortartutut nipilersortartutullu, timersornikkut aliikkusersuisartutut, nipilersortartutut, atuakkiortutut imaluunniit allatut tamatigut eqqumiitsuliortutut akissarsiat aningaasarsianit akileraarutit aamma sulisoqarnermut akitsuutip akilersinneqartarneri pillugit Namminersorlutik Oqartussat nalunaarutaanni § 7, imm. 8 atuuttoq naapertorlugu isertitatut B-tut isigineqartussanngorlugit aalajangersakkanik aalajangersaanissamik suliniuteqaq-qullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.”

Tamanna tunngavigalugu Inuit Ataqaatigiit allannguutissatut siunnersuutertik siuliani allassimasooq tunuartippaat.

Allannguutissatut siunnersuutaqaarpoq eqqumiitsuliortut CVR-normoqarlutik ingerlatsisut isertitanik B-nik isertitaqarnissamut periarfissaannik killiliisutut ataatsimiititaliamit nalilerneqarpoq, tassa eqqumiitsuliortut amerlasuut CVR-normoqarnatik namminersorlutik sulimmata.

Eqqumiitsuliortut aalajangersimasumik atorfeqaratik sulisut tamarmik eqaatsumik ingerlatsisinnaanissaat qulakkeerniarlugu allannguutissatut siunnersuut saqqummiunneqarpoq:

Allannguutissatut siunnersuummut ima oqaaseqaateqartoqarpoq:

- ”1. Naalakkersuisut missingiisinnaatitaanerat atuuttoq: Pissutsit immikkut atuutsillugit akisarsianik isertitatut B-tut inissiinissamut Naalakkersuisut § 75, imm. 4-mut innersuussillutik periarfissaqareerput. Eqqumiitsuliortut isertitaasa akileraartarnikkut qanoq suliarineqartarnissaat eqqarsaatigalugu eqqumiitsuliortut eqaannerusumik periarfissaqaqqullugit tamanna atorluarneqartariaqarpoq.
2. Atuuffiup annertusineqarnera: Isertitat B-t annertunerusumik atorneqarsinnaanerannut inatsit maanna atuuttoq periarfissiivoq, taakkunungalugu ilaapput namminersorluni sulineq sukkullu tamaana aliikkusersuineq. Pingaartumik aqqiussani ataasiakkaani eqqumiitsuliortut nipilersortartullu atorfeqarnissamut pinngitsaalisaanatik akiligassiissutissanik namminneq toqqaanissaminnut aammalu akileraarutissaminnik namminneq isumaginninnissaminnut periarfissaqartariaqarput.
3. Eqqumiitsuliortut namminneq toqqaasinnaatitaanerat: Eqqumiitsuliortut namminersorlutik kisimiillutilluunniit sulisut CVR-imi nalunaarsugaasariaqarneq apeqqutaatinnagu isertitanik A-nik B-nilluunniit namminneq toqqaanissamut periarfissaqartariaqarnerat qulakkeermavarput. Taamaaliornikkut akileraarutinut tunngatillugu isumagisassamik nammineq aqunnissaannut eqaannerusumillu sulinissamut periarfissinneqassapput.”

Kiisalu ataatsimiititaliap apeqqutaanut akissutiminni pissutsit makku Naalakkersuisut paasissutissiissutigaat.

Tassunga atatillugu Naalakkersuisunit oqaatigineqarpoq akileraartarnermik aqqiussusseqqinnermik suliaqarnermut atatillugu nipilersortut qitiutillugit misissuinerit ingerlanneqartut. Misissuinerit taakku suli ingerlasut paasissutissiissutigineqarpoq, taakkunungalugu tunuliaqutaavoq siusinnerusukku aalajangiiffigisassatut siunnersuutigineqartoq (UPA 2022/129) siunnersuummik matumani pineqartumik siunnersuuteqartumit aamma saqqummiunneqartoq. Ilaatigut tamanna tunngavigalugu ima oqaasertalimmik allannguutissatut siunnersuummik taarsiullugu saqqummiussisoqarsinnaanera Naalakkersuisut Aningaasaqarnermut Akileraartarnermullu Ataatsimiititaliamut siunnersuutigaat:

”Nipilersortartut akileraarusiinikkut nammineq isertitamik suliarineqarnerannut sunniuteqarnerulernissaat siunertaralugu, ilaatigut nipilersornermik inuussutissarsiortut peqatigalugit suleqatigiissitap pilersinneqartup suliaata inaarsarnissaanik siuarsaanissamik Naalakkersuisut peqquneqarnissaat pillugu Inatsisartunut aalajangiiffigisassatut siunnersuut.”

Ilaatigut apeqqummut Naalakkersuisut akissutaata imarisaa aallaavigalugu ataatsimiititaliamit ima paasineqarpoq; allannguutissatut siunnersuut siuliani allassimasoq, ataatsimiititaliamit isumaliutigineqartussatut Naalakkersuisunit siunnersuutigineqartoq, siusinnerusukku aalajangiiffigisassatut siunnersuutaasoq (UPA 2022/129) tunngavigalugu aallarnisarneqareersoq. Taamaattumillu tamanna pillugu Naalakkersuisut kissaataata malinnissaa ataatsimiititaliamit tunngavissaqarsorineqanngilaq.

Siunnersuutip aningaasaqarnikkut kingunerisassai

Siunnersuutip piviusunngortinneqarnerani aningaasatigut allaffissornikkullu kingunerisassat aalajangiiffigisassatut siunnersuummut tunngavilersuummi allaaserineqassasut Inatsisartut Suleriaasianni § 33, imm. 1-imi allassimavoq.

Taakku allaaserineqarnerat ataatsimiititaliamit annertunerusumik oqaaseqaatissaqarfigineqanngilaq.

Ataatsimiititaliap inassuteqaatai

Ataatsimiititaliap isumaqatigiittup allannguutissatut siunnersuutaa akuerineqassasoq ataatsimiititaliamit isumaqatigiittumit inassutigineqarpoq.

Akileraarutissat isertitatut A-tut imaluunniit B-tut suliarineqarsinnaanerannik periarfissap aammalu ingerlaavartumik naatsorsuusiortarnissap akileraarutissanillu B-nik eqqortumik akiliisarnissap isumaginissaata il.il. pingaaruteqarnera kiisalu siumoortumik naatsorsuusiortarnissap ukiumoortumillu naatsorsuutinik nalunaaruteqartarnissap pingaaruteqarnerat pillugit sukumiisumik paasisitsiniaanermik Naalakkersuisut sulissutiginninnissaat ataatsimiititaliamit isumaqatigiittumit kaammattuutigineqarpoq.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.

Peter Olsen
Siulittaasoq

Pele Broberg
Siulittaasup tullia

Marianne Paviassen Jensen

Kristian Jeremiassen

Karl Tobiassen

Kuno Fencker

Jens-Frederik Nielsen